



# 菩薩皆集佛所恭敬供養聞法

智 銘

——「大智度論」集粹之十一——

釋迦牟尼佛欲爲諸菩薩摩訶薩說般若波羅蜜，以大慈悲心，憐愍衆生，爲之說法斷疑，散身無數，入五道教化衆生。佛實不動，常入禪定，先世福德因緣故，身遍出聲，應物如響，如天使樂，自然發聲。從其身邊諸毛孔中自然有聲，隨心說法，是中佛無憶想，亦無分別。

「說密迹金剛經」中，云佛有三密：身密、語密、意密。一切諸天人皆不解不知。身密者：有一會衆生，或見佛身黃金色、白銀色、諸雜寶色。有人見佛身一丈六尺，或見一里、十里、百千萬億，乃至無邊無量徧虛空中，如是等名身密。語密者：有人聞佛聲一里，有聞十里，百千萬億與無數無量徧虛空中。有一會中，或聞說布施，或聞說持戒，或聞說忍辱、精進、禪定、智慧。如是乃至十二部經、八萬法聚，各各隨心所聞，是名語密。意密者：語等於意，皆遍法界，意觀其種子，或觀其三昧取形，或觀其本尊，是名意密。行此三密，則爲如來三密所加持，衆生之三業與如來之三密，入我我入，無二無別，三密相應，成就一切悉地。（註：三密相應，因而成就之妙果，謂之悉地）

諸佛持戒、禪定、智慧、度人，諸菩薩常欲見佛無厭足，見諸菩薩僧無厭足。諸菩薩於世間法皆以厭患，於上三事心無厭足

。佛問手居士：「汝幾事無厭生淨居天？」手居士答：「我三事無厭生淨居天：一、見佛供養無厭。二、聽法無厭。三、供給僧無厭。如佛在閻浮提，四部衆常隨逐佛，聽法、問法。是我淨居天，亦常從我聽法、問法。」聲聞猶尙聽法無厭足，何況法性身菩薩，當更無厭足。是以，凡來見釋迦牟尼佛及見彼諸菩薩摩訶薩紹尊位者，皆得陀羅尼及諸三昧，於諸三昧中而得自在。但得自在有分別，蓋三昧有二種：一者、佛三昧。二者、菩薩三昧。菩薩是於菩薩三昧中得自在，非於佛三昧中得自在。

諸菩薩雖各前來聽法或與佛住，但佛於弟子愛斷故，於弟子中心不著故。故諸菩薩欲往隨意，並不強求。蓋若菩薩遙見釋迦牟尼佛身小，心生小慢，言彼佛不如，增其慢心，反爲不妥。其實，諸佛法相相同。故普明菩薩來釋迦牟尼佛處聽法可，釋迦牟尼佛處菩薩欲往寶積佛處聽法亦可，欲往隨意。

三世諸佛皆以諸法實相爲師，諸菩薩固應供養諸佛，而諸佛亦互爲供養，佛身中有法，所作供養，非求福德，佛從無量阿僧祇劫中修諸功德，常行諸善，功德圓滿，不爲求報，爲敬功德故而作供養。如佛在時，有一盲比丘，眼無所見而以手縫衣，時鍼衽脫，便言：「誰愛福德，爲我衽鍼？」時佛到其所，語比丘：

「我是愛福德人，爲汝枉來。」是比丘識佛聲，疾起著衣禮佛足，白佛言：「佛功德已滿，云何言愛功德？」佛答：「我雖功德已滿，但深知功德因，功德果報，功德力。今我於一切衆生中得最第一，由此功德，是故我愛。」佛雖功德已滿，爲教化弟子故，語意是謂：「我尚作功德，汝云何不作？」佛爲教弟子故而作供養。

自手供養是身業，軟言問訊是口業，能起身、口業是意業，是三業得功德牢固，與佛道作因緣。佛、辟支佛、阿羅漢、一切諸賢聖，尚皆一心敬慎。魔若魔民及內身結使，種種先世罪報，皆是賊，近此諸賊故，更應一心敬慎。譬如入賊中行，不自慎護，必爲賊所得。再者，人心多散，如狂如醉，一心敬慎，則是諸功德門。攝心得禪，便得實智慧，得實智慧，便得解脫，得解脫便得盡苦。如是事，皆從一心得。

諸菩薩供養諸佛，非作人、天法供養，乃自行菩薩供養法。菩薩供養法，是身入禪定，其身直進，從其身邊出無量身，化作種種供養之物，滿諸佛世界。諸佛是第一福田，若供養者得大果報。譬如人廣修田業，爲多得穀故。諸菩薩見諸佛供養，得佛果報，是故應行供養。再者，菩薩敬重於佛，如人敬重父母。諸菩薩蒙佛說法，得種種三昧，種種陀羅尼，種種神力，知恩故應廣供養。

禮佛亦爲供養之一，人身中第一貴者頭，五情所著而最在上故。足第一賤，履不淨處，最在下故。是故，以所貴禮所賤，爲貴重供養，禮有下、中、上三者：下者揖，中者跪，上者稽首。頭面禮足，是上供養。以是故，佛毗尼中，下座比丘兩手提上座兩足，以頭面禮。行、坐、立、臥四儀中，見上座而行、而臥是爲不敬。坐者於供養不重，立者供養恭敬法重。一切五衆，身心屬佛，是故應立。所謂五衆，一者：比丘——受具戒之男子。二者：比丘尼——受具戒之女子。三者：式叉摩那，譯爲「學法女」，將受具戒而學六法之女子。四者：沙彌——出家受十戒之男子。五者：沙彌尼——出家受十戒之女子。以上五衆見佛或上座比丘皆應立。至於一切白衣，來到佛所如客，是故坐。但白

衣從遠來供養佛及諸上座，應立。

佛遣使見另佛，問訊爲禮。佛雖具一切智，隨世界法，世人問訊，佛亦問訊。佛，人中生，受人法，寒熱、生死與人等，問訊法亦應等。世界法中，大貴、大賤，不應相問訊，佛力等故，應相問訊。如多寶世界清淨莊嚴，佛身色光明亦大。寶積佛遣普明菩薩見釋迦牟尼佛，若不問訊，人謂輕慢，是故問訊，問訊亦爲供養法。

問訊之言，所以用：「少惱、少患、興居輕利、氣力安樂。」者，蓋有身皆有苦，病苦難免。病有二種：一者、外因緣病，如寒熱、饑渴、兵刃、刀杖、墮落、推壓、如是等種種外患，名爲惱。二者、內因緣病：如飲食不節、臥起無常、四百之病，如是等種種，名爲內病患。是故問「少惱、少患。」聖人實知身爲苦本，無不病時。四大合而爲身，地、水、火、風，性不相宜，各各相害，是故有病有患。「興居輕利，氣力安樂」者亦然。問訊法分二：卽問訊身、問訊心。「少惱、少患、興居輕利、氣力」者，是問訊身。「安樂」者，是問訊心。種種內外諸病，名爲身病，姪欲、瞋恚、嫉妬、慳貪、憂愁、怖畏等種種煩惱，九十八結，五百纏，種種欲願等，名爲心病。佛身有二種：一、神通變化身。二、父母生身。父母生身，受人法故，不如天。是故，應如人法問訊。但須知，此種問訊，全係隨世界法故，受人問訊。遣問訊，亦以人法。莫謂佛仍有心病也。

供養分上、中、下三種：下於己者而供養之，是下供養。供養勝於己者，是上供養。供養與己等者，是中供養。佛與佛等，互爲供養，是中供養。因供養而行布施，其福德有大小不同，蓋布施因緣分四種：一、施者清淨，受者不清淨。二、施者不淨，受者清淨。三、施者清淨，受者亦淨。四、施者不淨，受者不淨。佛施與佛，是爲二俱清淨，是福最大。以是故，佛自供養十方佛。

諸菩薩紹繼尊位，聞佛說法，故咸集佛所，恭敬供養聞法。

(完)